

福建通志

修陸拾柒册

北堂百册

福建列傳卷二十六

明十

黃鳳翔字鳴周晉江人隆慶戊辰進士第二人泉中科第不乏而明朝及第自鳳翔始授翰林編修奉命教內書堂內書堂者授小內使讀書之堂也故事皆翰林資深者充之至是以委新授翰林鳳翔與狀元修撰羅萬化探花編修趙志皋探古內侍之可爲法者積成卷帙授之俾讀誦萬曆初與修世宗實錄實錄成進修撰纂修會典管理誥勅充經筵官五年丁丑同考會試張居正奪情起復朝論不滿吉水鄒元標起家新進士上疏彈劾居正恚甚取中旨杖之鳳翔不平訟言於朝曰鄒公新進烈烈如是胡可死之屬其門生之爲鄒鄉人者調護多方元標竟無恙及居正一子會試示意鳳翔再與同考鳳翔固辭之使同官代而江陵子遂中選自是權要貴人皆爲其子營圖中選又有先容於鳳翔者方發口鳳翔左右視應以它辭遂罷癸未陞右諭德掌南京翰林院事甲申陞南國子監祭酒

念母歸養戊子起祭酒己丑陞禮部右侍郎兼翰林院侍讀學士充經筵講官疏論時政以用人理財之說進其疏曰頃者狡虜陸梁盤桓內地捐軍覆將遠邇震驚明明天子猶然安晏臣蒙恩列在班行衣繡肉食私自耻詎謂陛下誠宜惕厲憂勤屏游宴御朝講圖修攘天下承平久矣行伍空虛帑藏匱乏臣謂用人理財最急耳宋臣有言平居無極言敢諫之臣則臨難無敵愾敢死之士故軍中韓范西賊膽寒彼其當初皆極言敢諫者也吏部員外郎鄒元標與其他建言謫外諸臣如潘士藻孫如法皆其人也元標直聲勁節業受上知頃銓司業擬召用而聖意頓改于前士藻如法諸臣亦擬量移而章疏中寢夫以諸臣狂慙薄斥猶且不被收錄復奚望夫盧洪春李沂諸臣之獲譴獨重跼伏田畝者也平居靡爵祿臨難不全軀保妻子乎陛下方與輔臣面商邊事庶幾趙充國諸葛亮其人而何可不預蓄之也臣之爲陛下言用人也願陛下不以爲迂昔宋二祖欲積縑帛二百萬匹易胡人首宋太宗移內藏上供物爲用兵贍給之資二

君非堯舜而猶若是天子不言有無諸侯不言多寡今戶部二十萬之歲進既非舊額積爲常供屢經執奏未蒙俞允額外之輸貯諸內藏而經費資予外庭莫知如之何保無濫也臣見都城內外宮廟寺觀或建或修金碧堂宇壯麗煒煌詢諸道路皆曰內帑所捐而遠方梵刹之供奉歲時燕醮之費用亦復絡繹頻仍與其厚費冥漠之鬼神孰若蠲輸子遺之民命今東南財力已竭西北邊務方殷眞國民交病之日反裘負薪之景宋之藝祖太宗有何難逮出內帑之蓄以富軍市之資則養士募兵充然而有餘惟在霽發德音特賜停止則中外之懽聲雷動主計之常格大破臣之爲陛下言理財也願陛下不以爲狂臣起家詞林濫躋卿貳靡有尺寸上答崇高偶觸時艱謬陳膚見皆陛下之耳熱而諸臣之口贅顧謂臺省言之不聽則大臣言之一人言之不聽則人人言之亦謂天下大計無出此也疏入報聞時皇太子未立中外屬望而上意又欲國本之定出自君父宣諭閣臣冊立之典且需明歲第每使外庭知也未幾禮部禮部尙書于

慎行侍郎李長春及鳳翔遂上明春冊立之儀上怒曰朕密諭也而又宣之鳳翔與慎行長春並奪俸三月廷臣不敢有言而鳳翔復疏諍之疏入不報遂上疏乞休壬辰起禮部左侍郎癸巳改吏部俱兼官如故已升南禮部尙書復疏辭上以鳳翔素有清望不許再請許之甲午復起尙書復疏辭上復以鳳翔清望不許再上准以新銜在籍調用四十二年甲寅鳳翔卒訃聞上未及覽復有旨起爲南禮部尙書已知鳳翔歿予祭二壇仍加一壇造墳安葬鳳翔每讀一書輒有論著爲文爾雅深醇所著有田亭草若干卷又編輯嘉靖大政記嘉靖大政編年錄泉州府志天啟初賜謚文簡子淳中潤中

淳中字嗣真以廕授南京前府都事歷遷至柳州知府爲政廉平以蜚語去官父老攀轅不忍釋

潤中字嗣雨崇禎丁丑進士授刑部主事遷禮部員外郎有詔追贈皇五子孺孝悼靈王通元顯應真君一時朝議譁然潤中力爭言從來但有王

號無道號事乃寢出爲河南提學副使陞廣東參政備兵惠潮時京師已陷巡撫程珦遁其麾下將練克等劫摺紳將爲變潤中立制之乃止又有大帥某踞潮州城日以誅求爲事潤中勸以急宜勦寇勿擾民帥感動潮民乃安戶戶祝之以病告歸中塗爲流賊所獲括篋篋僅二硯賊訝之既知爲潤中曰早知是黃觀察何敢爾耶請護以歸潤中揮之使去歸後著書以老

明外史黃鳳翔傳鄉公存真集閩書明史

葉明元字可鳴同安人孝友喜讀書隆慶戊辰進士知石埭縣時政尙嚴肅明元獨寬易爲理遷南京刑部主事有百戶者張居正鄉人道殺人主者欲庇之明元竟抵之法居正父過南京傾都出謁明元獨不往出爲南安知府巡行勸課嚴禁弱女大庾學自天順時并郡學中道源書院亦爲居正所廢明元入覲具疏請復之皆允行遷貴州按察副使諸徭怙亂明元潛畫方略酋相次受縛因建邑浚河徙民規畫甚具進廣西參政

李熙字穆之晉江人隆慶戊辰進士選庶吉士除兵科給事中乞錄用世

宗時言事諸臣請祭清從祀孔廟糾中官馮保巨奸宜斥逐旁及戎政互市賑卹阜財諸疏皆有建白高拱當國欲令臺省掎擊閣黨盡逐先朝舊時左右同列有受指者以語熙熙不可已而拱竟去位受指者幾陷不測同官始服已張居正代拱偵熙與拱忤諷爲排不附已者熙復不應久之疏論譚綸劉顯及黔國公沐紹勛爲居正所擠謫南豐縣丞既至棲白鹿洞講學人士彬彬嚮風遷寧國知縣邑有累年不決疑獄熙察其冤釋之擢南京刑部主事出知高州府其地獠獍雜處寇賊充斥有司討之不能克熙示以恩信散其脅從境內肅然遷廣西按察副使府江有木鹽二稅歲可得羨帑千緡盡卻之付郡縣貯庫以備他需積勞成疾致仕歸道陞雲南參政舟次惠州卒

王任重字尹卿晉江人隆慶戊辰進士除廣州推官遷柳州同知有摺紳張某者居顯位其子弟橫行郡中至乘輿馬與守令爭道任重執而禁之盡發諸不法狀郡中肅然遂擢知其府和山賊煽動遣卒平之調貴陽府

時居正當國郵禁方嚴任重之貴陽猶循舊例發傳有希居正意者摘四
人以明奉法任重與焉謫金華推官吏部尙書嚴清知其廉潔居無何轉
揚州同知擢知曲靖府土酋繼榮者故羅雄知州外奉郡約束實四出劫
掠仕重白當道集兵勦之擒繼榮遂改爲羅平州鑄印設流官焉擢雲南
按察副使治瀾滄地近麓川多夷患任重積粟蒐卒夷人帖然擢陝西行
太僕少卿尋遷雲南參政會討猛酋任重職督饗兼率偏師協力犄角遂
俘猛酋收其地設三縣置吏如羅平再遷山東按察使兼參議專理漕運
時河決黃堦呂梁皆竭漕舟萬艘集黃河中任重濬淺滯力牽挽克如期
抵京帝念其勞晉太僕寺卿致仕歸杜門謝客泉州知府竇子偁慕之造
門請益適有隱田法當沒入欲以遺任重堅辭之所居鄉民例輸福全所
倉糧官吏武弁因緣爲奸轉運守待動至破產任重爲條利害於當事盡
革宿弊卒後鄉人立祠祀之任重少時卽有志聖賢之學守曲靖時適李
材爲副使遂以所學互相衍繹踐履益眞與王用汲俱晉江南鄙人爲諸

生出入相隨同舉進士其賢行又相類鄉人謂之二王

王用汲字明受晉江人爲諸生時郡被倭客兵橫市中會御史按部至用汲投轅言狀知府曰此何與諸生事用汲曰范希文秀才時以天下爲已任矧鄉井之禍乃不關諸生耶第隆慶戊辰進士授淮安推官署邳州知州河工方劇河道都御史皆倚辦用汲用汲程工酬直猾胥無得漁獵稍遷常德同知入爲戶部員外郎萬厯六年首輔張居正歸葬其親湖廣諸司畢會巡按御史趙應元獨不往居正嫌之及應元事竣得代卽以病請僉都御史王篆者居正客也素憾應元且迎合居正意屬都御史陳爌劾應元規避遂除名用汲不勝憤乃上言御史應元以不會葬得罪輔臣遂爲都御史爌所論坐託疾欺罔削籍臣竊恨之夫疾病人所時有今在廷大小諸臣曾以疾請者何限若以爌言推之則諸臣皆懷欺之甚不容一日立乎其位矣且無論諸臣卽爌當世宗朝亦養病十餘年後寅緣攀附驟引要津以退爲進宜莫如爌已則行之而反以責人何以服天下夫事

有其貌則是而意則非者如昨歲星變考察將以弭災也而所摧抑者半不附宰臣之人如翰林習孔教則以鄒元標之故禮部張程則以劉臺之故刑部浮躁獨多於他部則以艾穆沈思孝而推戈者後劣轉趙志皋又以吳中行趙用賢而遷怒蓋能得輔臣之心則雖經論列之潘晟且得以不次蒙恩苟失輔臣之心則雖素質才名之張岳難免以不及論調臣不意陛下省災塞咎之舉僅爲宰臣酬恩報怨之私凡附宰臣者亦各藉以酬其私可不爲太息哉應元之斥已奉明旨非一介賤臣所能回天臣不避斧鉞特爲是言者欲使權臣聞之謂天下猶有不可威劫之士或稍斂戢於將來是臣所以忠陛下之心也疏入居正大怒欲下獄廷杖會次輔呂調陽在告張四維擬削用汲籍帝從之居正以罪輕移怒四維厲色待之者累日方用汲拜疏時尚書殷正茂召責之曰斯事舉朝耐之爾何獨乃爾用汲曰唐之佛骨宋之和議舉朝可耐韓愈胡銓不能耐士固各有志也正茂默然用汲歸屏居郊外布衣授徒不踐城市居正死起補刑部

未上擢廣東僉事尋召爲尙寶卿進大理少卿每朝廷有大議常引誼力爭不少撓尋遷順天府尹南京右副都御史總督操江南京多中貴請託顧獨憚用汲干謁爲衰止會勦太湖劇盜殲其魁就遷兵部侍郎改吏部晉刑部尙書以病乞歸用汲爲人剛正遇事敢爲自尹京後累遷皆在南以彊直故也卒贈太子太保諡恭質 以上道光舊志

蔡貴易字邇逼一字道生同安人隆慶戊辰進士知江都縣未赴改崇德崇德浙西孔道軸轡冠蓋相接貴易悉罷諸供應之擾民者民輸粟京師奸胥獵賄意爲高下貴易差產授役釐毫不爽人詫爲神明復包角堰以捍海潮歲連稔含山巨盜楊雲潘榜者糾衆橫行撫按謀遣將貴易曰無庸乃用閒擒其魁餘黨解散擢南京戶部陝西司主事有徽州商素感恩醵金四百追贖卻之商人立四知亭記焉陝西司董錦衣入倉米鹽弊實不可問貴易坐秕糠塵垢中雖盛暑隆寒不少避吏不能爲奸進員外郎遷禮部郎中出知寧波府貴易爲大學士余有丁門下士有丁寧波人貽

書戒其家曰是其報我不以私毋庸私覬也貴易至造請士大夫問民疾苦其或通關說卽詞色無所假時有丁議開海外金塘大榭二山謂可墾腴田二萬畝佐軍興貴易曰此國初所徙地也役烝黔而資巨室何利焉事遂寢貴易東事精敏雖千人之衆數年之久凡一見皆記然性宏厚不屑鉤距去太甚而已先是諸衛所賂結府胥移借軍儲至數千金貴易悉置於法饟蠹一清海上漁商二稅舊輸郡帑貴易貯之鄞定海著爲令居五年遷貴州按察副使歷參議水西土酋安國亨致餽卻之自是國亨頗首受約束惟謹進浙江按察使民間之喜曰是故浙中良守也會潮州學士董琨祭酒范應期獄起告訐者蜚集貴易曰是無賴子易燭安足聽一時撫按方以搏擊爲風裁知貴易不爲動則徑下監司郡守已琨家盡破應期投繯死事聞帝震怒當事者咸獲重譴人始服其持重會入計臺省構其短鐫一秩遂歸子獻臣字體國萬歷己丑進士授刑部主事遷南京吏部文選郎中改北時帝久不視朝獻臣疏請早定國儲己又疏請福藩

之國鄭貴妃恚甚夜發內使執獻臣旦入對據舊典力爭帝嘉其直旋出
爲南畿參議遷湖廣按察使罷歸百姓爲立祠尋起爲浙江按察副使天
啓時擢南京太常卿爲魏瑞所劾削籍歸邑有海豐莊田數百畝其上爲
朱埭決則田皆沒嘗屢築屢壞獻臣慨然任其役第田爲三等以次出資
凡築石岸千九百八十餘丈於是歲以有收鄉人德之

閩書

蔡應科字思誠龍溪人父結性醇慤讀書山舍有村女投宿叱去之應科
隆慶戊辰進士除瑞州推官遷戶部主事同舍郎王用汲疏論張居正斥
爲民應科獨往餞之歷郎中出知廣西府崇儒愛士獄無冤民土酋羅雄
內訌應科登陴誓衆設伏得賊釋其累密使齎蠟書遺酋謀主以閒之謀
主旣去酋失助遂被俘遷貴州按察副使進陝西參政時礦使方張發冢
鎔金者相踵應科力爭之先偕中使按視虛實傳告者有好狀卽逮治之
擢廣東按察使就遷左右布政使萬曆三十五年以右副都御史巡撫廣
西首禁土酋毋得入鎮城文武將吏毋得聽細人言驚擾其馴服者手爲

文告示之曾盡感泣安南寇蹂欽州兩廣督臣大索賊令廣西犄角應科
誓諸將吏勿妄殺一人招降多者論功視克捷乃命多爲表幟建表夷村
之前曰善村建幟夷隘之口曰招降得夷人毋困之過夷聚落毋擾動擒
獲招撫凡萬餘人應科皆戒勿殺自軍興以至凱旋竟不血刃雲南夷鳳
酋聚衆倡亂撫臣奉旨往征乞餉金廣東西以五萬旨已下矣應科上言
雲南之求助於兩廣者坐窘餉也兩廣之不能爲雲南助者坐餉窘也邇
厥所繇則由國稅之未停罷也蓋未稅之前則以稅爲餉既稅之後則移
餉爲稅而餉缺勢必取公帑矣公帑匱勢必漸去兵兵少勢必生戎心召
外患矣竊謂今日陛下倘免雲南之稅何須求助於廣東西倘免廣東西
之稅亦何至莫助於雲南此特在九重之上言之寬耳三殿重建貴州
當採運黔撫復以困匱爲言工部請責廣西協濟貴州木價銀十萬以五
年爲期應科復言陛下嘗念貴州貧免貴州稅矣嘗念遼東邊撤稅使以
遼稅充遼餉矣廣西與貴州等貧而宗祿兵餉之匱乏爲甚與遼東等邊

而物力遜之陛下何不以念遼念貴者念西人也帝又欲以四川稅使來兼廣西稅應科又陳其可虞者二不便者三事已西兵持廣東鹽爲餉東人欲增課應科爭之東人稅及西人米又爭之四十一年進南京戶部右侍郎兼右僉都御史總督漕儲累辭不允四十三年遷南京都察院右都御史上疏累言今衆情所仰望者有第一大事則皇子之講學皇長孫之出閣也有第一善事則礦稅之罷免也內帑之給發也有第一急事則科道官考選之賜允與舊科道之允請允差也有第一切要事則章奏之無留中及中旨之無徑出也又嘗上三事曰疏詞戒冗晦稱戒沿襲論列戒深刻又請定官詳之格列賢否之實欲於考論之下分列五款曰操守曰才幹曰心術曰年曰貌母炫支詞每飾遁語使考人者不爲皮傅考於人者不爲膚受據考人考於人以觀人者不爲影捉用以存注考之舊章冀以得賢才之實用並見嘉納尋卒官贈太子少保賜祭葬

戴燿字德輝一字鳳奇長泰人時宗曾孫隆慶戊辰進士除新建知縣歷

官至副都御史巡撫廣西

府志載平岑溪蠻考廣東前事略岑溪蠻之叛在萬曆初總制凌雲翼降之而耀撫廣西在二

十三年於進兵部侍郎總督兩廣軍務交趾賊翁富兩犯欽州耀前督安

南都統黎維新後督副將楊應春討平之復平府江徭解川湖急難南黎

反側者帝嘉其功進秩兵部尚書督粵凡十三年牧養安輯蠻夷帖服中

使採珠廣東爲民患耀極言其不便疏留中耀清正自持多不得要人歡

適交趾莫酋同楊扶安等作亂耀謂宜勿用師惟檄維新勒兵討之兵未

交要人喉言者効失計遂坐解職既而賊竟就擒天啓初錄舊勳復原官

耀貌魁梧美髭性宏毅慈祥在制府久未嘗輕戮一人居時獄有重囚

潛結客兵爲內應夜率其黨越堦殺知縣耀聞變負劍入縣戒民勿動急

閉市門柵屹坐指揮盡擒之卒年八十

田一儁字德萬大田人隆慶戊辰會試第一選庶吉士授編修奉使淮藩

不受餽索進修撰遷侍講萬曆五年吳中行攻張居正奪情趙用賢等繼

之居正怒不測一儁偕侍講趙志皋修撰沈懋學等疏救格不入乃會王

錫爵等詣居正所爲廷杖者解居正默不應則昌言責以綱常之義且曰天地鬼神其可欺乎天下萬世之口可盡箝乎居正嘆之未幾志皋等被逐一僞先請告歸獲免居正沒起故官修大明會典數月復引疾歸久之起攝南京國子監事居二年召爲北祭酒擢禮部侍郎兼侍讀學士掌翰林院辭疾歸未行卒贈禮部尙書一僞禔身嚴苦然不欲以潔白標厯宦二十餘年莫知其貧者迨病篤諸門人侍卧榻覩所食用率麤糲疏布一蕭然寒士也及卒董其昌爲庶吉士請假走數千里護其喪歸葬

以上道光舊志

裴應章字元闇清流人隆慶戊辰進士授行人萬厯初兩奉使德晉二府

當陞見奏對進止有度帝屬目焉擢吏科給事中嘗使遼曰擊遼左險要

乃畫善後策六事條上之悉見嘉納遷兵科都給事中值西陲數入犯應

章上制馭策悉中機宜劾罷撫臣之棄師者憲臣之昏庸與勳臣之不法

將臣之縱賊賒卒者風采肅然張居正當國嘗建議三歲一遣大臣行邊

應章言靡費當罷大璫馮保欲取太僕寺馬三千匹應章執勿予中貴人